

四庫全書

史部

欽定四庫全書

東觀漢記卷十七

列傳十二

虞延

虞延字子大陳留人為郡功曹世祖聞而奇之建武二十年東巡路過小黃高帝母昭靈后園陵在焉時延為郡督郵詔呼引見問園陵之事延進止從容瞻拜可觀其園陵樹葉皆諳其數俎豆犧牲頗曉其禮帝善之勅

延從駕到魯還經封邱城門下小不容羽蓋上怒使撻
侍御史延因下見引咎以為罪在督郵上詔曰以陳留
督郵虞延故貸御史罪賜延錢及帶劔佩刀還郡永平

初守新野功曹鄧寅

案范書本
傳作鄧衍

以外戚小侯每預朝會

而容止趨步有出于衆上目之顧左右曰朕之儀貌豈
若此人特賜輿馬衣服延以寅雖有容儀而無實行未
嘗加禮上乃詔令自稱南陽功曹詣闕拜郎中遷玄武
司馬寅在職不服父喪帝聞乃嘆曰知人則哲惟帝難

之信哉斯言寅聞慙而退

郭丹

郭丹字少卿南陽人累世千石父稚為丹買田宅居業
丹從師長安從宛人陳洮買符入函谷關既入關封符
乞人乃慨然而歎曰丹不乘使者車不出此關既至京
師常為都講更始二年三公舉丹賢能徵為諫議大夫
持節使歸南陽安集受降自去家十二年果乘高車出
關如其志焉更始敗諸將軍悉歸上普賜封爵丹無所

歸節傳以敝布纏裹節晝伏夜行求謁更始妻子奉還
節傳因歸鄉里為郡功曹薦陰壹程胡魯歆自代太守
杜詩曰古者卿士讓位今功曹稽古含經可謂至德編
署黃堂以為後法丹師事公孫昌敬重常侍重編席顯
異之為司徒在朝名清廉公正永平五年薨詔問丹家
時宗正劉匡對曰郭丹為三公典牧州郡田畝不增

周澤

周澤字穉都北海安邱人少修高節耿介特立好學問

治嚴氏春秋門徒數百人隱居山野不汲汲于時俗建
武十六年辟大司馬府署議曹祭酒為黽池令奉公克
己妻子自親釜竈拜太常果敢直言數有據爭朝廷嘉
其清廉北地太守廖信貪污下獄詔以信田宅奴婢錢
財賜廉吏太常周澤

牟融

牟融字子優

案范書本傳融北海安邱人

遷大司農性明達居職修

治又善論議朝廷稱為名卿帝數嗟嘆以為才堪宰相

孫堪

孫堪

案范書本傳堪字子緝河南緱氏人

為光祿勳以清廉見稱與周澤

相類

魏應

魏應字君伯任城人拜五官中郎將諸儒于白虎觀講
論五經同異使應專掌難問

劉般

劉般字伯興彭城人代名忠孝兼屯騎校尉

案范書本傳永平十

年微般行執金吾
事明年兼此職

時五校尉官顯職閤府寺寬敞輿服

光麗伎巧畢給故多以宗室肺腑居之為太僕在朝竭
忠盡謀建初元年拜為宗正憂勤國事夙夜不怠數納
嘉謀

劉愷

劉愷字伯豫

案愷般長子

以當襲父般爵封居巢侯讓與其

弟憲遁逃避封久之章和中有司奏請絕國上美其義
特優嘉之愷猶不出有司復奏之侍中賈逵上書曰孔

子稱能以禮讓為國於從政乎何有和帝納之下詔曰
故居巢侯劉般嗣子愷當襲父般爵而稱父遺意致國
弟憲遜亡七年所守彌固蓋王法崇善成人之美其聽
憲嗣爵乃徵愷拜為郎稍遷侍中愷之入朝在位者莫
不仰其風行

郭賀

郭賀字喬卿洛陽人為荊州刺史百姓歌之曰厥德文
明治有殊政顯宗巡狩賜以三公之服蔽冕之旒

吳良

吳良字大儀齊國人習大夏侯尚書為郡議曹掾歲旦
與掾吏入賀門下掾王望言曰齊郡敗亂遭離盜賊人
民饑餓不聞鷄鳴犬吠之音明府視事五年土地開闢
盜賊息滅五穀豐登家給人足今日歲首請上雅壽掾
吏皆稱萬歲良時跪曰門下掾謠佞明府勿受其觴盜
賊未盡人庶困乏不能家給人足今良曹掾尚無袴寧
為家給人足耶望曰議曹情竊自無袴寧足為不家給

人足耶太守歛容而止曰此生言是遂不舉觴賜良鰓
魚百枚轉良為功曹良耻以言受進終不肯謁東平王
蒼辟為西曹掾數諫蒼多善策蒼上表薦良上以章示
公卿曰前見良頭鬚皎然衣冠甚偉求賢助國宰相之
職蕭何舉韓信設壇即拜不復考試今以良為議郎遷
司徒長史以清白方正稱

劉平

劉平字公子楚郡人

案范書本傳平本名曠顧宗後改為平

以仁孝著聞

更始時天下亂平弟仲為賊所殺其後賊忽然而至平
扶持其母奔走逃難抱仲遺腹女而棄其子母欲還取
之平不聽曰力不能兩活仲不可以絕類遂去不顧與
母俱匿野澤中平朝出求食為餓賊所得將烹之叩頭
曰今旦為老母求菜老母饑少氣待歸為命願得歸飯
母畢還就死因涕泣賊哀而遣之平還食母訖因白曰
屬與賊期義不可負遂還詣賊衆皆大驚相謂曰嘗聞
烈士今乃見之去矣吾不忍食子於是得全平既免乃

擬焚得三升豆以謝賊恩永平三年為宗正數薦達名士承宮郇恁等

承宮

承宮

梁范書本傳
宮字少子

琅邪姑幕人少孤年八歲為人牧豬

鄉里徐子盛明春秋經授諸生數百人宮過其廬下見諸生講誦好之因忘其豬而聽經豬主怪其不還行求索見生欲笞之門下生共禁乃止因留精舍門下樵薪執苦數十年間遂通其經遭王莽篡位天下擾攘盜賊

并起遂避世漢中建武四年將妻子之華陰山谷耕種
禾黍臨熟人就認之宮悉推輿而去由是顯名永平中
徵為博士遷左中郎將數納忠諫論議切直名播匈奴
時單于遣使求欲得見宮詔敕宮自整飭對曰彼徒炫
名非實識也臣狀醜不可以示遠宜選長大威容者帝
乃以大鴻臚魏應代之

鍾離意

鍾離意

案范書本傳意字子阿會稽山陰人

辟大司徒侯霸府詔部送徒

詣河內時冬寒徒病不能行路過弘農意輒移屬縣使
作徒衣縣不得已與之而上書言狀意亦具以聞上得
奏以見霸曰君所使掾何乃仁于用心誠良吏也意在
堂邑為政愛利輕刑慎罰撫循百姓如赤子初到縣中
無屋意出奉錢帥人作屋人齎茅竹或特材木爭赴趨
作決日而成功作既畢為解土祝曰案解土太平御覽作民士興功
役者令百姓無事如有禍祟令自當之人皆大悅顯宗
時意為尚書交趾太守坐贓千金徵還伏法詔以其貲

物班賜羣臣意得珠璣悉以委地而不拜賜上怪問其
故對曰臣聞孔子忍渴於盜泉之水曾參迴車于勝母
之間惡其名也此贓穢之物誠不敢拜受上嗟嘆曰清
乎尚書之言乃更以庫錢三十萬賜之詔賜降人縑尚
書案事誤以十為百上見司農上簿大怒召郎將笞之
意因叩頭曰過誤之失常人所容若以懈慢為愆則臣
位大罪重郎位小罪輕笞皆在臣臣當先笞乃解衣就
格上意乃解上欲起北宮意上書諫出為魯相後起德

陽殿殿成百官大會上謂公卿曰鍾離尚書若在不得成此殿

宋均

宋均字叔庠

案范書本傳均南陽安衆人

為九江太守有兩山名曰

唐后山有神祠衆至共為嫁娶皆取百姓男女不復要娶巫家女百姓患之長吏莫敢改之均乃移書曰自今已去當為山娶巫家女其後乃絕建武中山陽楚郡多蝗蜚南到九江輒東西別去由是名稱永平七年徵為

尚書令忠直言數納策謀每駁議未嘗不合上意

朱酺

朱酺

宋范書作都夷傳酺作輔

梁國寧陵人明帝時為益州刺史移

書屬郡喻以聖德白狼王等百餘國重譯來庭歌詩三

章酺獻上

鮐陽鴻

鮐陽鴻字孟孫中山人為世名儒永平中拜少府

楊政

楊政字子行京兆人治梁邱易與京兆祁聖元同好俱
名善說經書京師號曰說經鏗鏘楊子行論難僞僞祁
聖元政師事博士范升建武中升為太常丞為去妻所
誣告坐事繫獄當服重罪政以車駕出時伏道邊抱升
子持車叩頭武騎虎賁恐驚馬引弓射之不去旄頭以
戟叉政傷胸前政涕泣求哀上即尺一出升政嘗過揚
虛侯馬武武稱疾見政對几據床欲令政拜牀下政入
戶前排武徑上牀坐武帳言語不擇因把臂責之曰卿

蒙國恩備位藩臣不思求賢報國而驕天下英俊今日
搖動者刀入脅左右大驚以為見叔操兵滿側政顏色
自若會信陽侯至責數武令為朋友其果勇敢折皆此
類也

薛漢

薛漢字子公

集范書本傳
作字公子

淮陽人才高名遠兼通書傳

無不照覽道術尤精教授常數百弟子自遠方至者著
為錄

郇恁

郇恁字君大鴈門人也

案郇恁范書周亮黃憲傳序及文選李善注並作荀恁

居教授東平憲王蒼為驃騎開東閣延賢士辟恁署為祭酒敬禮焉後朝會明帝戲之曰先帝徵君不來驃騎辟君而來何也恁曰先君秉德以惠下臣可以禮進退驃騎執法御臣臣懼法而至

案北四句文選李善注作先帝秉德惠下臣故不來

驃騎將軍執法檢下臣故不敢不來

月餘遂去官

徐匡

永平中車駕出信陽侯陰就於干突車騎簿車府令齊國徐匡鈞就車收御者送獄詔書譴匡匡自繫獄吳良上言信陽侯驕慢干突車騎大不敬無人臣禮匡執法守正而下獄恐政化由是而墜詔出匡左遷卽邱長

書吳良傳帝雖赦匡猶左轉良爲卽丘長則左遷者吳良非匡也此文疑誤

張重

張重曰南計吏形容短小明帝問云何郡小吏對曰臣曰南計吏非小吏也

姜詩

姜詩字士遊廣漢雒人也適值年荒與婦傭作養母詩性至孝母好飲江水令兒常取水溺死夫婦痛恐母知詐曰行學歲歲作衣投於江中俄而湧泉出舍側味如江水日生鯉一雙賊經詩里不敢驚孝子

宋太平御覽作赤翁賊經

其里落東兵安步云不可驚孝子

致肉米詩埋之後吏謫詩詩掘示之

趙孝

趙孝字長平沛國蘄人父為田禾將軍孝為郎歸告母

往來常白衣步擔嘗從長安來過直上郵亭但稱書生
寄止於亭門塾亭長難之告有貴客過灑掃不欲穢污
地良久乃聽止吏因問曰田禾將軍子從長安來何時
發幾日至孝曰尋到矣時天下亂人相食弟禮為賊所
得孝聞即自縛詣賊曰禮久餓羸瘦不如孝肥賊并放
之建武初天下新定穀食尚少孝得穀炊將熟令弟禮
夫妻俱出外孝夫妻共蔬食比禮夫妻歸即曰我已食
訖以穀飯獨與之積久禮心怪疑後掩伺見之亦不肯

食遂共蔬食兄弟怡怡

案虞世南北堂書鈔作孝得穀收將熟時弟他出至暮始回孝

待之同飯雖蔬食茹菜兄弟怡怡與此異

鄉里歸德孝辟太尉府顯宗聞其

行官至長樂衛尉弟禮為御史中丞帝嘉其篤行寵異之詔禮十日就長樂衛尉府太官送供具相對盡歡數年禮卒令孝從官屬送喪歸也

魏譚

魏譚字少間琅邪人王莽末政亂盜賊起人民相食譚為賊所得等輩數十皆縛束當稍就噉見譚貌謹敕獨

放令主炊養有賊長公哀譚謂曰汝曹皆當以次死哀
縱汝急從此去譚不肯去叩頭曰我當為諸君主炊養
食醬肉肌香餘皆菜食羸瘦肉腥臊不可食願先等輩
死長公義之即相謂此兒有義可哀縱也賊遂皆放之
數十人皆得脫譚有一孤兄子年一二歲常自養親遭
饑饉分升合以相存活譚時有一女生裁數月念無穀
食終不能兩全棄其女養活兄子州郡高其義

李善

李善字次孫南陽人本同縣李元蒼頭建武中疫病元家相繼死沒惟孤兒續始生數旬而有資財千萬諸奴私共計議欲謀殺續分財產善乃潛負逃亡隱山陽瑕丘界中親自哺養乳為主連續孩抱奉之不異長君有事輒長跪請白然後行之閭里感其行皆相率修義續年十歲善與歸本縣修里舊業告奴婢子長吏悉收殺之時鍾離意為瑕丘令上書薦善行狀

東觀漢記卷十七

欽定四庫全書

東觀漢記卷十八

列傳十三

第五倫

第五倫字伯魚京兆長陵人修行清白王莽末盜賊起
時米石萬錢人相食倫獨收養孤兄下外孫分糧共食
死生相守鄉里以此賢之倫步擔往候鮮于褒留十餘
日將倫上堂令妻子出相對以屬託焉倫自度仕宦牢

落遂將家屬客河東變易姓名自稱王伯齊嘗與奴載鹽北至太原販賣每所至客舍去輒為糞除道上號曰道士開門請求不復責舍宿直京兆尹閻興召倫為主簿時長安市未有秩又鑄錢官姦宄所集無能整齊理之者興署倫督鑄錢掾領長安市倫平銓衡正斗斛市無阿枉百姓悅服其後小民爭訟皆云第五掾所平市無姦枉欺詐之巧倫每見光武詔書常歎曰此聖主也當何由一得見決矣等輩笑之曰汝三皇時人也爾說

將尚不下安能動萬乘主耶倫曰未遇知己道不同故

耳

案范書本傳李賢注引華嶠書曰蓋延代鮮于裒為馮翊多非法倫數切諫延恨之故滯不得舉將州將

謂延也

諸王當歸國詔書選三署郎補王家長吏除倫為

淮陽王醫工長時輩除者多殺盡但假印倫請於王王賜之綬嘗見上曰聞卿為吏極妻父不過從兄飯寧有之耶對曰臣三娶妻皆無父臣生遭饑饉米石萬錢不敢妄過人飯曰聞卿為市掾有人遺卿母一筍餅卿知從外來奪之母遂探口餅出之有諸對曰實無此衆人

以臣愚蔽故為此言也。倫性節儉，作會稽郡，雖有二千石卧布被，自養馬，妻炊爨，俸祿常取赤米，與小吏受等財，留一月俸餘，皆賤糶與民。饑羸者為事徵，百姓攀轅扣馬呼曰：

素太平御覽作初代到當發百姓老小聞府門攀車扣馬啼呼曰

舍我何之

倫密委去，百姓聞之，乘船追之，交錯水中，其得民心如此。倫免官歸田里，不交通人物，躬與奴共發棘田種麥。倫為司空，奉公不撓，言事無所依違。諸子諫止輒叱之。每上封，自作草，不復示祿吏。或民奏記言便宜，便上封。

去年伏誅者刺史一人太守三人被死罪二人凡六人

案范書本傳倫為三公值帝屢有善政乃上疏褒稱盛美去年以下乃其疏中述近事語前後文闕

桓虞

桓虞字伯春

案范書章帝紀李賢注作字仲春

馮翊萬年人遷尚書僕

射據法斷事周密平正以為能擢為南陽太守

鄧彪

鄧彪字智伯南陽人也父邛世祖中興從征伐以功封

邛侯彪少修孝行厲志清高與東郡宗武伯翟敬伯陳

綏伯張弟伯同志好齊名稱南陽五伯彪以嫡長為世子
邯薨彪當嗣爵讓國與異母弟鳳明帝高其節詔書
聽許鳳襲爵彪仕州郡為太尉在位清白以廉讓率下
為百僚式視事四年以疾乞骸骨賜策罷贈錢三十萬
所在以二千石俸終其身

鄭弘

會稽鄭弘字巨君為鄒縣令魯春雨霜鄒穀獨無災為
太尉以日食免

袁安

袁安

案范書本傳字邵公汝南汝陽人

為河南尹十餘年政令公平未

嘗以贓罪鞠人常歎曰凡士之學高欲望宰相下及牧
守錮人於聖代尹不忍為也和帝始加元服太后詔安
為賓賜束帛乘馬安為司徒每朝會憂念王室未嘗不
流涕

朱暉

朱暉字文季南陽人暉之先宋微子之後也以國氏姓

周衰諸侯滅宋奔碭易姓為朱後徙于宛暉外祖父孔
休以德行稱于代暉早孤有氣決年十三莽敗天下亂
與外氏家屬從田間奔入宛城道遇羣賊賊操弓弩欲
裸奪婦女衣服昆弟賓客皆惶迫伏地莫敢動暉拔劍
前曰財物皆可取諸母衣不可得今日朱暉死日也賊
義其小壯其志笑曰童子內刀遂舍之為郡督郵太守
阮况當嫁女欲買暉婢暉不敢與及况卒暉送其家金
三斤人問其故暉曰前不與婢者恐以財污府君今重

送欽明已心也驃騎將軍東平王蒼辟暉為掾正月旦將軍當奉璧賀故事少府給璧時陰就為少府吏甚驕慢求不可得暉遙見就主簿持璧謂曰我素聞璧未嘗見借觀之主簿授暉暉授令史主簿遽白就就曰朱掾義士勿求之蒼罷朝謂暉曰掾自視孰與蘭相如再遷臨淮太守暉好節概有所拔用皆厲行之士表善黜惡抑強絕邪歲常豐熟吏民畏而愛之為之歌曰強直自遂南陽朱季吏畏其威民懷其惠建武十四年四方牛

大疫臨淮獨不疫鄰郡人多牽牛入界暉為守數年坐
考長吏囚死獄中州奏免官暉同縣張堪有名德每與
相見常接以友道暉以堪宿成名德未敢安也堪至把
暉臂曰欲以妻子託朱生暉舉手不敢答堪後仕為漁
陽太守暉自為臨淮太守絕相聞見堪後物故南陽餓
暉聞堪妻子貧窮乃自往候視見其困厄分所有以賑
給之歲送穀五十斛帛五匹以為常

韋彪

韋彪

案范書本傳彪字孟達扶風平陵人

上議曰二千石皆以選出京師

剖符典千里

案范書本傳建初中為大鴻臚時陳事者言郡國貢舉率非功次咎在州郡詔下公

卿朝臣議此蓋彪議中語范書節去

韋豹

韋豹

案豹彪族子

字李明數辟公府輒以事去司徒劉愷辟

之謂曰卿輕人好去就故爵位不踰今歲垂盡當辟御史意在相薦子其留乎豹曰犬馬齒衰豈敢久待論薦之私非所敢當遂跣而起愷追之遙去不顧

郭躬

郭躬

朱范書本傳躬字仲孫潁川陽翟人

家世掌法務在寬平章和元年

赦天下繫囚在四月丙子以前減死罪一等勿笞詣金城而文不及亡命未發覺者躬上封事曰伏惟天恩莫不蕩宥死罪以下並蒙更生而亡命捕得獨不沾澤臣以為赦前犯死罪而繫在赦後者可皆勿笞詣金城以全人命有益于邊上善之即下詔赦焉

鄭均

鄭均字仲虞任城人也治尚書好黃老淡泊無欲清靜
自守不慕游宦凡仲為縣游徼頗受禮遺均數諫止不
聽即脫身出作歲餘得數萬錢歸以與凡曰錢盡可復
得為吏坐贓終身捐棄兄感其言遂為廉潔稱清白吏
均好義篤實失凡事寡嫂恩禮敦至養孤兒兄子甚篤
已冠娶出令別居並門且盡推財與之使得一尊其母
然後隨護視賬給之均屢辟不詣公車時徵拜侍御史
月餘遷尚書肅宗敬重之後以病告歸均遣子英奉章

詣闕詔召見英問均所苦賜以冠幘錢布元和元年與毛義各賜羊一頭酒二斗終其身帝東巡過任城乃幸均舍敕賜尚書祿以終其身故時人號為白衣尚書

王景

王景

樂范書本傳景字仲通樂浪誨邯人

治浚儀賜山海經河渠書建初

八年景為廬江太守乃教民種麻桑而養蠶

廉范

廉范字叔度京兆人也祖父客死蜀漢范年十五與客

步負喪歸至葭萌船觸石破沒范持棺柩遂俱沉溺衆傷其義鉤求得之僅免於死太守張穆持筒中布數篋與范范曰石生堅蘭生香前後相違不忍行也遂不受為雲中太守始到烽火日通故事虜出度五千人乃移書旁郡求助吏白今虜兵度出五千請移警檄范不聽遂選精兵自將出至近縣令老弱城守而追之為蜀郡太守成都邑宇偏側舊制禁民夜作以防火而更相隱蔽燒者日日相屬范乃毀削前令但嚴使儲水百姓為

便民歌之曰廉叔度來何暮不禁火民安堵昔無襦今
五袴百姓皆喜家得其願時生子皆以廉名者千數章
和二年帝崩范奔赴敬陵還入城見道中有諸生來小
車馬頓死泥中諸生立旁不能自進時范問為誰所從
來生白廬江太守掾嚴麟為太守奉章來弔范惻然令
從騎下馬與之不告而去麟事畢不知馬所歸緣路訪
之或謂麟曰故蜀郡太守廉叔度好賙人窮今奔國喪
當是時麟亦素聞范名以為然即牽馬造門謝而歸之

世伏其高義

王阜

王阜

案阜范書作連附見南蠻西南夷傳

字世公蜀郡人少好經學年十

一辭父母欲出精廬以少不見聽後阜竊書誦盡日辭

欲之捷為定生學經攜錢二千布兩端去母追求到武

陽北男謁舍家得阜將還後歲餘白父昇曰今我出學

仕宦儻至到今母乘跛馬車昇憐其言聽之定所受韓

詩年七十為食侍謀童子傳授業聲聞鄉里

案北段文義難明疑

有脫

補重泉令政治肅清舉縣畏憚吏民向化鸞鳥集

於學宮阜使五官掾長沙疊為張雅樂擊磬鳥舉足垂

翼應聲而舞翾翔復上縣庭屋十餘日乃去為益州太

守邊郡吏多放縱阜以法繩正吏民不敢犯禁政教清

靜百姓安業神馬四出滇河中甘露降白鳥見連有瑞

應世謂其用法平正寬慈惠化所致大將軍竇憲貴盛

以絳屬襜褕與阜不受憲嘗移書益州取六百萬阜疑

有姦詐以狀上憲遣奴歸帳下吏李文迎錢阜以詔書

未報拒不與文積二十餘日詔書報給文以錢市焉

秦彭

秦彭字國平

案范書本傳作字伯平扶風茂陵人

元成間宗族五人同為

二千石故號為萬石秦氏彭擢開陽城門候為山陽太守時山陽新遭地動後饑旱穀貴米石七八萬百姓窮

困彭下車經營勞來為民設四誠以定父母妻子長幼之序擇民能率眾者以為鄉三老選鄉三老為縣三老令與長吏參職崇儒雅貴庠序尚德化不任刑名春秋

饗射升降揖讓務禮示民吏民畏愛不敢欺也後拜潁
州太守老弱啼號滿道彭在潁川鳳凰麟麒嘉禾甘露
之瑞集于郡境

玄賀

玄賀字文弘

秦常璩華陽國志
作字文和宕渠人

遷鄴令政化大行為九

江太守行縣齋持乾糒但就溫湯而已臨去日百姓扶
車叩馬啼泣隨之

曹褒

曹褒字叔通

案范書本傳褒魯國薛人

篤學有大度常慕叔孫通為

漢儀禮晝夜沉思寢則懷鉛筆行則誦文書當其念至

忽忘所之舉孝廉拜車府令在射聲營舍有停棺不葬

者百餘所褒親自履行問其意故吏對曰此等多是建

武以來絕無後若褒愴然為買空地悉葬其無主者設

祭以祀之遷城門校尉將作大匠時疾疫褒愍哀病徒

親自省治醫藥饘粥多蒙濟活

賈逵

賈逵字景伯

樂范書本傳逵扶風平陵人

長八尺二寸能講左氏及

五經本文以大

夏侯尚書教授京師為之語曰問事

不休賈長頭永平十七年公卿以神雀五采翔集京師

奉觴上壽上召逵敕蘭臺給筆札使作神雀頌建初元

年詔逵入北宮虎觀南宮雲臺使出左氏大義書奏上

嘉之賜布五百匹衣一襲拜侍中領騎都尉內備帷幄

兼領秘書近署甚見信用

江草

江革字次翁

宋范書本傳革齊國臨淄人

客東海下邳傭賃以養父

母下邳知其孝市賈輒與好善者雖無錢任貰與之革
專心養母幅巾履屨母年八十革不欲搖動之常自居
輓輓車不用車馬永平中拜五官中郎將每朝會帝常
使虎賁扶持及進拜恒自禮焉時有疾不會輒敕大官
送餐膠恩寵莫與為比于是京師貴戚順陽侯衛尉馬
廖侍中竇憲慕其行各奉書致禮遺革終不發書無所
報受帝聞而益善之

名馴

名馴字伯春

宋范書本傳馴九江壽春人

以志行稱鄉里號之曰德

行恂恂名伯春以明經有智讓講論拜議郎

宋范書本傳不載馴

曾為議郎

章和中為光祿勳

李育

李育字元春

案范書本傳育扶風漆人

為侍中時章帝西謁園陵育

陪乘問舊事育輒對由是見重

杜安

杜安字伯夷潁川定陵人貴戚慕其名或遺其書安不發悉壁藏之後捕貴戚賓客安開壁出書而書如故由是不罹其患

杜根

和熹郡后臨朝權在外戚杜根

案根安子范書本傳根字伯堅

以安帝

年長宜親政事乃與同舍郎上書直諫太后大怒收執根等令盛以縑囊于殿上撲殺之執法者以根知名私語行事人使不加力既而載之城外根得蘇太后使人

檢視遂詐死三日目中生蛆因得逃竄及鄧氏誅根方
歸徵拜侍御史

杜篤

杜篤字季雅

案范書本傳篤京兆杜陵人

客居美陽與美陽令交遊

數從請託不諧頗相恨令怒收篤送京師會大司馬吳
漢薨世祖詔諸儒誅之篤于獄中為誄辭最高帝美之
錫帛免刑仕郡文學掾以目疾二十餘年不窺京師篤
外高祖辛武賢以武畧稱篤常歎曰杜氏文明善政而

篤不任為吏辛氏秉義經武而篤又怯于事外內五世至篤衰矣

宋揚

宋揚扶風平陵人永寧二年遣大鴻臚持節至墓追封

當陽侯

宋范書清河王慶傳揚女為章帝貴人生清河王慶慶長子祐嗣立是為安帝追謚宋貴人曰

敬隱后追封謚揚為當陽侯

趙興

司隸校尉下邳趙興不卹諱忌每入官舍輒更繕修館

宇移穿改築故犯妖禁而家人爵祿益用豐熾官至潁川太守子峻太傅以才器稱孫安世魯相三葉皆為司隸時稱其盛

趙勤

趙勤字益卿

集太平御覽作字孟卿

南陽人劉賜姊子童幼有志

操賜國租適到時勤在旁賜指錢示勤曰拜乞汝二十

萬勤曰拜而得錢非義所取終不肯拜

集此段一本作勤少孤嘗從人

貸錢或以錢示勤曰汝起拜即與汝勤曰拜汝得錢非義終不肯拜勤明達好學介然特

立太守賂珍召署曹吏至掾督郵為南陽太守桓虞功
曹委以郡事虞下車葉令雍霸及新野令皆不遵法乃
署勤督郵到葉見霸不問縣事但高譚清論以激勵之
霸即解印綬去勤還入新野界令聞霸已去遣吏奏記
陳罪復還印綬去虞乃嘆曰善吏如良鷹矣下鞬即中
嘗有重客過欲屬一士令為曹吏虞曰我有賢功曹趙
勤當與議之客潛于內中聽虞乃問勤勤對曰恐未合
衆客曰止止弗復道

毛義

廬江毛義性恭儉約少時家貧以孝行稱為安陽尉
南陽張奉慕其義往候之坐定而府檄到當守令義奉
檄而入白母喜動顏色

淳于恭

淳于恭字孟孫北海人以謙儉推讓為節家有山田橡
樹人有盜取之者恭助為收拾載之歸乃知是恭橡盜
載橡還之恭不受人又有盜刈恭禾者恭見之念其愧

因自伏草中至去乃起養兄崇孤兒教誨學問時不如意輒呼責數以撻自擊其脛欲感之兒慙負不敢復有過恭家井在門外上有盆鄰里牧牛而爭飲牛恭惡其爭多置器其上為預汲水滿之小兒復爭恭各語其父母父母乃禁怒之里落皆化而不爭

梁鴻

梁鴻

梁范書本傳鴻字伯鸞扶風平陵人

少孤以童幼詣太學受業治禮

詩春秋常獨坐止不與人同食比舍先炊已呼鴻及熟

釜炊鴻曰童子鴻不因人熱者也滅竈更燃火鴻家貧而尚節博覽無不通畢乃收豕於上林苑中曾誤遺火延及他舍乃尋訪燒者問所失財物悉推豕償之其主猶以為少鴻曰無他財願以身居作主人許因為執勤不懈耆老見鴻非恒人乃共責讓主人而稱鴻長者于是始敬鴻還其豕鴻不受初與京邑蕭友善約不為陪臣及友為郡吏鴻以書責之而去鴻鄉里孟氏女容貌醜而有節操多求之不肯父母問其所欲曰得賢壻如

梁鴻者鴻聞乃求之

案太平御覽作梁鴻妻同郡孟氏其女名光狀醜而肥力舉石臼擇

對不嫁願得如鴻者至年三十鴻聞聘之

女椎髻著布衣操作具而前鴻大

喜曰此真梁鴻妻也能奉我矣字之曰德耀名孟光將

妻之霸陵山耕耘織作以供衣食彈琴誦詩以娛其志

鴻將之會稽作詩曰維季春兮華阜麥含金兮方秀適

吳依大家臯伯通廡下為賃舂每歸妻為具食不敢于

鴻前仰視舉案齊眉伯通察而異之曰彼傭賃能使

其妻敬之如此非九人也鴻常閉戶吟詠書記遂潛思

著書十餘篇鴻病因與伯通及會稽士大夫語曰昔延陵季子葬子于贏博之間不歸其鄉慎弗聽妻子持尸柩去後伯通等為求葬處有要離冢高燥衆人曰要離古烈士今伯鸞亦清高令相近遂葬要離冢傍子孫歸扶風

高鳳

高鳳字文通南陽人誦讀晝夜不絕妻嘗之田曝麥于庭以竿授鳳令護鷄鳳受竿誦經如故天大雷暴雨淹

沒鳳留意在經史忽不視麥麥隨水漂去鄉里有爭財
持兵而鬪鳳往解之不已乃脫巾請曰仁義邈讓奈何
棄之爭者感之收兵謝罪鳳年老執志不倦聲名著聞
太守連召請恐不得免自言鳳本巫家不應為吏又與
寡嫂詐訟曰遂不仕

郭鳳

郭鳳字君張勃海人善說災異吉凶占應病先自知嘗
豫令弟子市棺歛具至其日而卒

東觀漢記卷十八

欽定四庫全書

史部

東觀漢記卷

十九至
二十四

詳校官編修臣李潢

編修臣裴謙覆勘

總校官進士臣程嘉謨

校對官助教臣李巖

謄錄監生臣劉星軫

欽定四庫全書

東觀漢記卷十九

列傳十四

張酺

張酺字孟侯

東觀漢記酺汝南細陽人

祖父充與光武同門學光

武即位求問充充已死永平九年詔為四姓小侯開學

置五經師酺以尚書授于南宮令入授皇太子太子家

時為奢侈物未嘗不正諫甚見重焉顯宗以酺授皇太

子業甚得輔導之體章帝即位出拜東郡太守賜錢三十萬酺下車擢賢俊擊豪強賞賜分明郡中肅然薦郡吏王青三世死節青從此除步兵司馬酺傷青不遂復舉其子孝廉元和二年帝東巡狩幸東都引酺及門生郡縣掾吏並會庭中帝先備弟子之儀使酺講尚書一篇使尚書令王酺與酺相難然後修君臣之禮賞賜殊特帝甚欣悅酺罰斷義勇遷魏郡太守百姓垂涕送之滿道和帝初酺上言臣聞王者法天獎惑奏事太微故

州牧刺史入奏事所以通下問知外事也數十年以來
重其道歸煩擾故時止弗奏事今因以為故事臣愚以
為刺史視事滿歲可令奏事如舊典問州中風俗恐好
惡過所道事所聞見考課衆職下章所告及所自舉有
意者賞異之其尤無狀逆詔書行罪法冀敷戒其餘令
各敬慎所職予以衰減貪邪便佞黜拜太尉詔射聲教
尉曹褒案舊漢儀制漢禮酺以為褒制禮非禎祥之特
達有似異端之術上疏曰褒不被刑誅無以絕毀實亂

道之路酺為太尉父尚在酺每遷轉乃一到維父來適會正臘公卿罷朝俱賀歲奉酒上酺父壽極歡莫不嘉其榮以日食免

韓棱

韓棱字伯師潁川人也除為下邳令視事未暮吏人愛慕時鄰縣皆電傷稼棱縣界獨無電遷南陽太守下車表行義投幽滯發摘姦盜郡中震慄權豪懾伏政號嚴平

巢堪

巢堪字次朗太山南城人為司空十四年自乞上印綬
賜千石俸

魯恭

魯恭字仲康扶風人父建武初為武陵太守卒官時恭
年十二弟丕年七歲晝夜號踊不絕聲郡中賄贈無所
受及歸服喪禮過成人耽思閉門講誦兄弟雙高太尉
趙憙聞恭志行每歲遣人送米肉辭讓不敢當恭憐丕

小欲先就其名託病不仕郡數以禮詣謝不肯應母強遣之恭不得已而行因留新豐教授建初中丕舉秀才恭乃始為郡吏拜中牟令宿訟許伯等爭陂澤田積年州郡不決恭平理曲直各退自相責讓時郡國螟傷稼犬牙緣界不入中牟河南尹袁安聞之疑其不實使仁恕掾肥親往察之恭隨行阡陌俱坐桑下有雉過止其旁旁有童兒親曰何不捕之兒曰雉方將雛親默然有頃與恭訣曰所以來者欲察君治迹耳

案此句太平御覽作本來考君

界有無
蟲耳

今蟲不犯境此一異也化及鳥獸此二異也豎

子有仁心此三異也府掾久留但擾賢者因還府具以
狀白安帝時伐匈奴恭上疏諫曰竊見竇憲耿秉銜使
奉命暴師于外陛下親勞憂在軍役誠欲以安定邊陲
為民除害臣思之未見其便數年以來民食不足國無
蓄積盛春興發擾動天下妨廢農時以事夷狄非所以
垂意于中國憫念民命也恭上疏曰舉無遺策動不失

其中

案此疏前後文闕范書
不載未知何時所上

魯丕

魯丕字叔陵性沈深好學孳孳不倦

案虞世南北堂書鈔作專心于學朝

夕政

兼通五經以魯詩尚書教授為當世大儒拜趙相

為政尚寬惠禮讓雖有官不廢教門生就學百餘人關東號曰五經復興魯叔陵

徐防

徐防

案范書本傳防字謁卿沛國鉅人

上疏曰試論語本文章句但通

度勿以射策冀令學者務本有所一心專精師門思核

經意事得其實道得其真於此宏廣經術尊重聖業有
益于化雖從來久六經衰微學問寢淺誠宜反本改矯
其失安帝元年郡國被水災比州湮沒死者以千數災
異數降西羌反叛殺畧人吏京師淫雨螽賊傷稼穡防
比上書自陳過咎遂策免

案范書本傳防時為太尉參錄尚書事虞世南北堂書鈔

云以日蝕免與此異

陳寵

陳寵字昭公沛國人曾祖父咸哀平間以明律令為侍

御史王莽篡位父子相將歸鄉里閉門不出乃收家中律令文書壁藏之以俟聖主咸常戒子孫曰為人議法當依于輕雖有百金之利慎毋與人重比故世人謂陳氏持法寬寵辟司徒鮑昱府掾屬專尚文遊以不肯親事為高寵常非之獨勤心物務為尚書性純淑周密慎重時有表薦輒自手書削草人莫得知常言人臣之義苦不畏慎自在樞機謝遣門人不復教授絕知友之路章帝時決獄多近于重寵上疏諫曰先王之政賞不僭

刑不濫與其不得已寧僭故古賢君相歎息重戒者重
刑之至也為廣漢太守先是雒陽城南每陰雨常有鬼
哭聲聞于府中寵使案行昔歲倉卒時骸骨不葬者多
寵乃敕縣埋葬由是即絕為廷尉有疑獄輒手筆作議
所活者甚多

陳忠

陳忠 案忠寵子范書
本傳忠字伯始 為尚書令數進忠言辭采鴻麗前

後所奏悉上于官閣以為故事疏曰語云迎新千里送

舊不出門

案此疏前後文闕范書不載未知何時所上

尹勤

尹勤字叔梁南陽人治韓詩事薛漢身牧豕事親至孝
無有交遊門生荆棘

何熙

何熙字

案此下原闕一字

溫

案范書本傳作字孟孫陳國人

身長八尺體貌魁梧

與人絕異和帝偉其貌特拜謁者熙能為威容贊拜殿
中聲動左右為御史中丞羣僚憚之

魏霸

魏霸字喬卿

案一本作字延年

濟陰人也建初中為郎霸孤兄

弟子來候霸以所乘車馬遣送之至成臯郎官有乘皂
蓋車者見兄子乘車疑而格殺之霸聞悲淚晝夜泣涕
至病為鉅鹿太守妻子不到官舍常念兄與嫂在家勤
苦而已獨尊樂故常服麤糲不食魚肉之味婦親蠶桑
服機杼子躬耕農與兄弟子同苦樂不得有異鄉里慕
其行化之性清約質樸為政寬恕正色而已不求脩于

人掾吏有過輒私責數不改休罷之終不暴揚其惡為將作大匠吏皆懷恩人自竭節作業無譴過之事延平

元年仕為光祿大夫

案范書本傳延平元年霸為太常明年以病致仕為光祿大夫此延

平元年下當有闕文

霸妻死長兄伯為霸取妻送至官舍霸笑曰

年老兒子備具矣何用空養他家老嫗為即自入辭其妻手奉案前跪霸曰夫人視老夫復何中而遂失計義不敢相屈即拜而出妻慚求去遂送還之

應順

應順字華仲汝南南頓人少與同郡許敬善敬家貧親老無子為敬去妻更娶為東平相事後母至孝精誠感應梓樹生廳前屋上徙置府庭繁茂長大

應奉

應奉案奉順曹孫范書本傳奉字世叔

為武陵太守興學校舉側陋政

稱遠邇

應劭

應劭案劭字仲遠

案仲遠范書本傳李賢注引續漢書文士傳作仲援漢官儀又作仲瑗未

是知孰

父奉司隸校尉劾少便篤學博覽多聞

鄭璩

鄭璩

案璩范書張
璩傳作據

字平卿黎陽人建初五年辟司徒府

拜侍御史上疏曰臣斗筭之小吏擢在察視之官職任
過分當刺邪矯枉詔書示官府曰璩盡節剛正亦何陵
遲之有賜璩素六十匹由是顯名轉司隸校尉為漢陽
太守以嚴刻見稱

樂恢

樂恢字伯奇

案范書本傳恢京兆長陵人

父親為縣吏有罪令欲殺

之恢年十一常伏寺東門外凍地晝夜啼泣令乃出親

京兆尹張恂台恢署戶曹吏竇憲出征匈奴恢上書諫

曰春秋之意王者不理夷狄得其地不可墾發得其人

無益于政故明王之于夷狄羈縻而已孔子曰遠人不

服則修文德以來之以漢之盛不務修舜禹周公之德

而無故興干戈動兵革以求無用之物臣誠惑之

何敞

何修生成為漢膠東相成生果為大中大夫果生比干
為丹陽都尉遷廷尉正張湯為廷尉以殘酷見任增飾
法律比干常爭之存者千數比干生壽蜀郡太守壽生
顯京輔都尉顯生鄢光祿大夫鄢生寵濟南都尉寵生
敞案范書本傳敞字文高扶風平陵人為汝南太守百姓化其恩禮高譚
等百八十五人推財相讓

周榮

周榮

葉范書本傳榮字平孫廬江舒人

為尚書令在納言管機密盡心

奉職夙夜不怠

梁諷

梁諷北地弋居人征匈奴屯軍于邊以大漠威靈招之
匈奴畏感奔馳來降諷輒為信檄遣還營前後萬餘人
相屬于道

李恂

李恂

梁范書本傳恂字叔英安定臨涇人

遭父母喪六年躬自負土樹柏

常在冢下為兖州刺史所種小麥胡蒜悉付從事一無

所留清約率下常席羊皮布被食不二味為張掖太守
有威重名時大將軍將兵屯武威武威天下州郡遠近
莫不修禮遺恂奉公不阿為憲所奏免復徵為西域副
校尉西域殷富多珍寶諸國侍子及督使賈胡數遺恂
奴婢宛馬金銀香罽之屬一無所受遷武威太守後坐
事免無田宅財產居山澤結草為廬餉遺無所受處新
安關下拾橡實為食

王渙

王渙

案范書本傳渙字稚子河內溫人

除河內溫令商賈露宿人開門

臥人為作謠曰王稚子代未有平徭役百姓喜為雒陽
令盜賊發不遠走或藏溝渠或伏甕下渙以方畧取之
皆稱神明馬市正數從買羹飯家乞貸不得輒毆罵之
至忿渙聞知事實便諷吏解遣

黃香

黃香字文彊江夏安陸人也父况舉孝廉為郡五官掾
貧無奴僕香躬執勤苦盡心供養冬無被袴而親極滋

味暑即扇牀枕寒即以身溫席年九歲失母慕思憔悴殆不免喪鄉人稱其至孝年十二博覽傳記家業虛貧

衣食不贍舅龍鄉侯為作衣被不受帝賜香淮南孟子

各一通

案范書本傳時元和初年香為郎中

詔令詣東觀讀所未嘗見書

謂諸王曰此日下無雙江夏黃童也詔詣安福殿賜錢

三萬黃白絺各一端香知古今記羣書無不涉獵兼明

圖識

案兼明太平御覽作兼好

天官星氣鍾律厯算窮極道術京師

號曰天下無雙國士瞻重京師貴戚慕其聲名更饋衣

物拜尚書郎嘗獨止宿臺上晝夜不離省闥上聞善之
以香父尚在賜臥几靈壽杖香拜左丞功滿當遷詔書
留增秩拜尚書遷僕射香上疏曰以錐刀小用蒙見宿
留為尚書曉習邊事每行軍調度動得事理上知其勤
數加賞賜香勤力憂公畏慎周密每用奏議所建畫未
嘗流布然事執平法常持輕類全活非一為魏郡太守
俗每太守將交代添設儲峙輒數千萬香未入界移敕
悉出所設什器及到頗有即撤去到官之日不祭竈求

福閉門絕客

黃瓊

黃瓊

葉瓊香子

字世英以德行高妙公車徵拜議郎

黃琬

黃琬

葉琬琬孫

字子琰少失父曾祖香祖瓊並有高名

張霸

張霸字伯饒蜀郡成都人年數歲有所噉必先讓父母鄉里號曰張曾子九歲通春秋復欲進業父母語汝小

何能多少以樊條刪嚴氏公羊春秋猶多繁辭乃減為二十萬言更名張氏之學

周紆

周紆字文通

案范書本傳紆下邳人

為勃海太守詔書到門不出

先遣吏到屬縣盡決罪行刑坐徵詣廷尉繫獄數日免歸家貧無以自贍身築塹以自給食章帝知憐之復以為郎

李充

李充

樂范書本傳充字大遜陳留人

兄弟六人出入更衣家貧親老充

妻勸異居充使釀酒會親戚充啟其母曰此婦勸異居

不可奉祭祀請去之遂叱去其婦魯平為陳留太守請

充署功曹充不受平怒乃援充以捐溝中因謫署都亭

長

司馬均

司馬均字少賓東萊人隱居教授誠信行乎州里鄉人有爭曲直者輒言敢祝少賓乎心不直者終不敢祝也

汝郁

汝郁字叔異陳國人年五歲母被病不能飲食郁常抱持啼泣亦不飲食母憐之強為餐飯欺言已愈郁視母色未平輒不食宗親共異之郁再徵載病詣公車尚書敕郁自力受拜郁乘輦白衣詣止車門臺遣兩當關扶郁入拜郎中

張表

張表字公儀奉之子也

案范書張奉附見劉平諸人傳序表不載遭父喪疾

病曠年目無所見耳無所聞服闋醫藥救療厯歲乃瘳
每彈琴惻愴不能成聲見酒食未嘗不泣宗人親厚節
會飲食宴為表不設樂

郭玉

郭玉者

案常璩華陽國志玉字通直

廣漢人也學方診之伎和帝奇

異之乃試令嬖臣美手腕者與女子雜處帷中使玉各
診一手玉言左陽脈右陰脈有男女疾若異人臣疑其
故帝歎稱善

鄭衆

衆范書有宦者傳載鄭衆以下九人攷劉知幾史通謂桓帝令崔實等作孫程傳稱程為

順帝功臣則知本書不別立宦者傳今從之編附于各朝諸臣後用見當日史官曲筆可為記述者

戒之

鄭衆字季產

衆范書本傳衆南陽曄人

為人謹敏有心永平中初給

事太子家肅宗即位拜小黃門遷中常侍和帝初竇太后秉政兄大將軍憲等並竊威權朝臣上下莫不附之而衆獨一心王室不事豪黨帝親信焉及憲兄弟圖作不軌衆遂首謀誅之以功遷大長秋

東觀漢記卷十九

欽定四庫全書

東觀漢記卷二十

列傳十五

張敏

張敏

案范書本傳敏字伯達河間鄆人拜司空

以行大射禮陪位頓仆乃策

曰今君所苦未瘳有司奏君年體衰羸郊廟禮儀仍有

曠廢鼎足之任不可以缺重以職事留君其上司空印

綬

楊震

楊震字伯起弘農人受歐陽尚書于桓郁明經博覽無不窮究諸儒為之語曰關西孔子楊伯起震公廉不受私謁子孫常蔬食步行故舊長者或欲令為開產業震不肯曰使後世稱為清白吏子孫以此遺之不亦厚乎為東萊太守道經昌邑邑令王密故所舉茂才夜懷金十斤以遺震震曰故人知君君不知故人何也密曰夜無知者震曰天知神知何謂無知為太尉性忠誠每陳

諫諍中常侍樊豐等譖之收印綬歸本郡震到雒陽都
亭顧謂子及門生曰吾蒙恩居上司姦臣狡猾而不能
誅寵嬖傾亂而不能禁帑藏虛賞賜不節而不能塞何
面目以見日月遂飲酖而死

楊秉

楊秉

秉秉震仲子范書
本傳秉字叔節

諫桓帝曰王者至尊出入有常

警蹕而行

秉范書本傳時帝數
微行故秉有是諫

楊賜

楊賜

案賜
秉子

字伯獻光和有虹蜺晝降嘉德殿上引賜

等入金商門崇德署問以祥異對曰案春秋識曰天投

蜺天下怨海內亂加四百之期象見吉凶聖人則之今

妾媵嬖人閹尹之徒共專國朝欺罔日月而令搢紳之

徒委伏畎畝口誦堯舜之言身蹈絕俗之行亡捐溝壑

不見逮及冠履倒易陵谷代處

案范書本傳賜
時為光祿大夫

賜代劉

郃為司徒帝欲造畢圭靈昆苑賜上疏諫曰竊聞使者

並規度城南民田欲以為苑昔先王造囿裁足以修三

驅之禮薪菜芻牧皆悉往焉先帝之制左開鴻池右作
上林不奢不約以合禮中今猥規郊城之地以為苑圃
廣壞田園廢民居畜禽獸殆非所謂保赤子之義以病
罷居無何拜太常詔賜御府衣一襲自所服冠幘綬玉
壺革帶金錯鈎佩

任尚

任尚編草為船置于薄上以渡河掩擊羌胡

薛苞

汝南薛苞

案范書劉平等諸人傳序苞作苞

字孟常喪母以孝聞父要

後妻而憎苞分出日夜號泣不能去至被毆杖不得已廬于舍外旦入而洒掃父怒又逐之乃廬于里門晨昏不廢積歲餘父母慙而還之

馮良

馮良字君郎南陽人少作縣吏耻在廨役因壞車殺馬毀裂衣冠從杜撫學

所輔

所輔平原人為縣門下小吏縣令劉雄為賊所攻欲以
矛刺雄輔前叩頭以身代雄賊等遂戟刺輔貫心洞背
即死東郡太守捕得賊具以狀上詔書傷痛之

蔡倫

蔡倫字敬仲桂陽人為中常侍有才學盡忠重慎每至
休沐輒閉門絕賓客曝體田野典作尚方造意用樹皮

及敝布魚網作紙

案一本作倫典尚方作紙用故麻元
名麻紙木皮名穀紙魚紙名網紙

興元年奏上之帝善其能自是莫不用天下咸稱蔡侯

紙

龐參

龐參字仲達

案范書本傳參河南緱氏人

拜漢陽太守郡民任崇者

有奇節參到往候之崇不與言但以齋一本水一杯置戶屏前自抱孫兒伏于戶下參思其微意良久曰崇是欲曉太守也水者欲吾清也技大本齋欲吾擊強宗也抱兒當戶欲吾開門恤孤也于是歎息而還參在職果能抑豪助弱以惠政得民為太尉以災異策免

李固

李固字子堅漢中南鄭人也司徒劬之子固貌狀有奇表鼎角匡犀足履龜文少好學常步行隨師不遠千里

張耽

張耽將吏兵繩索相懸上通天山

左雄

劉據為大司農以職事被譴召詣尚書將加箠據尚書

左雄

案范書本傳雄字伯豪而即涇陽人

諫帝曰九卿位亞三公行則鳴

王孝明永平始加撲罪非古制也帝從之卿于是始免撲墮

周舉

周舉字宣光

案范書本傳舉汝南汝陽人

姿貌短陋而博學洽聞為

儒者所宗京師語曰五經縱橫周宣光

張綱

梁冀作平上駟車侍御史張綱

案范書本傳綱字文紀犍為武陽人獨埋

輪于雒陽都亭曰豺狼當道安問狐狸遂奏冀

王堂

王堂

案范書本傳堂字敬伯廣漢郫人

為汝南太守教掾吏曰其憲章

朝右委功曹陳蕃

吳祐

吳祐字季英陳留人父恢為南海太守祐年十二恢欲殺青簡以寫經書祐諫曰今大人踰越五嶺遠在海濱其俗舊多珍怪此書若成則載之兼兩昔焉援以蕙蔭興誇王陽以衣囊徵名嫌疑之間誠先賢所慎也恢乃

止撫其首曰吳氏世不乏季子矣年二十喪父獨居家
無擔石而不受贍遺常牧豕于長垣澤中行吟經書遇
父故人謂之曰卿二千石子而杖鞭牧豕縱子無恥奈
君父何祐辭謝而已守志如初公沙穆遊太學無資糧
乃變服客傭為祐傭舂祐與語大驚遂共訂交于杵臼
之間遷膠東相

案范書本傳祐舉孝廉以
光祿四行遷膠東侯相

政惟仁簡以

身率物民有相爭訴者輒閉閤自責然後科其所訟以
道譬之或身到閭里重相和解自是爭隙省息吏民不

欺

祝良

祝良字邵平長沙人為雒陽令常侍樊豐妻殺侍婢置井中良收其妻殺之

朱遂

中山相朱遂到官不出奉祠北嶽詔曰灾暴緣類符驗不虛政失厥中狼灾為應至乃殘食孩幼朝廷愍悼思維咎徵博訪其故山嶽尊靈國所望秩而遂比不奉祠

怠慢廢典不務懇惻淫刑放濫害加孕婦毒流未生感和致災其詳思改救追復所失不有遵憲舉正以聞案司

馬彪五行志陽嘉元年十月望都蒲陰狼殺兒童九十七人故有是詔范書失載

邱騰

邱騰知罪法深大懷扶姦巧稽留道路下獄死

韓昭

韓昭強賦一億五十萬檻車徵下獄

趙序

趙序取錢鏐三百七十五萬

孫程

孫程字稚卿北新城人衛康叔之冑孫林父之後為中黃門安帝崩初江京等譖誣太子廢為濟陰王居西鍾

下徵北鄉侯為嗣

案范書安帝紀及本傳此句上下當有闕文

程謀誅江京

于盛化門外與馬國等相見詐謂馬國曰天子與我棗脯與若棗者使早成之程等十八人收斬江京閭顯等迎立濟陰王是為順帝閭顯弟景為衛尉從省中還外

府收兵至盛德門尚書郭鎮率直宿羽林出逢景景因
斫鎮不中鎮劒擊景墮車左右以戟义其胷禽之送廷
尉以功封程為浮陽侯萬戶又封中黃門王康華容侯
王國鄴侯

苗光

孫程賦棗脯分與苗光曰以為信今暮其當著矣漏盡
光為尚席直事通燈解劒置外持燈入章臺門程等適
入光走出門欲取劒王康呼還光不應光得劒欲還入

門已閉光便守宜秋門會李閏來出光因與俱迎濟陰王幸南宮雲臺詔書錄功臣令康疏名康詐疏光入章臺門光謂康曰緩急有問者當相證也詔書封光東阿侯食邑四千戶未受符策光心不自安詣黃門令自告有司奏光欺詐主上詔書勿問遂封東阿侯邑千戶

籍建

中常侍籍建追封為汝陰東鄉侯

東觀漢記卷二十

欽定四庫全書

東觀漢記卷二十一

列傳十六

胡廣

胡廣 樂范書本傳廣字伯始南郡華容人 為太傅總錄尚書事時年八十

而心力克壯母在堂朝夕瞻省旁無几杖言不稱老達練事體明解朝章雖無謬直之風屢有補裨之益

陳龜

陳龜

案范書本傳龜字叔珍上黨注氏人

為五原太原後卒西域胡夷并

涼民庶咸為舉哀弔祭其墓

劉祐

劉祐

案范書本傳祐字伯祖中山安國人

為河東太守時屬縣令長率多

中官子弟百姓患之祐到摧其權強平理寃結政為三

河表

李雲

桓帝誅大將軍梁冀而中常侍單超等五人皆以誅冀

功並封列侯又立掖庭民女亳氏為皇后數月間后家封者四人賞賜巨萬時地數震裂衆灾頻降白馬令李

雲

樂范書本傳雲字行祖甘陵人

素剛憂國乃露布上書移副三府曰

孔子曰帝者諦也今官位錯亂小人諂進財貨公行政令日損是帝欲不諦乎帝得奏震怒下有司送雲黃門北寺獄弘農五官掾杜衆傷其忠直獲罪上書願與雲俱得死遂俱死獄中

韋毅

韋毅為陳留太守桓帝延熹九年生賊自殺

宗資

汝南太守宗資

案范書本傳李賢注引謝承書云資字叔都南陽安衆人

任用善士

朱紫區別

陳蕃

陳蕃

案范書本傳蕃字仲舉汝南平輿人

為光祿勳上疏切諫云鄙諺曰

盜不過五女門以女能貧家也今後宮之女數千食肉

衣綺豈不貧國乎

案范書本傳桓帝時封賞踰制內寵張盛蕃上疏諫帝頗納其言

段頰

段頰字紀明

案范書本傳頰武威姑臧人

有文武智畧時東郭寶公

孫舉等聚衆三萬人為亂遣兵討之連年不克桓帝詔

公卿選將有文武者司徒尹詒薦頰乃拜為中郎將頰

到設施方畧旬月羣盜悉破頰破羌胡

案范書頰傳明時延熹二年

年春餘羌復寇張掖頰自下馬大戰力盡羌亦引退頰

追之晝夜兼行食雪四十餘日頰上疏曰先零諸羌討

之難破降為上策戰為下計

案范書本傳頰期於誅盡諸羌深斥招降之謬此疏

當非太后詔云此以慰神光馬賢等亡魂也
案范書本傳靈帝建

寧元年春顯大破先零諸種于逢義山
時竇太后臨朝下詔褒顯此其詔文
顯曰張奐事勢

相反逆懷猜恨
案范書本傳建寧元年夏顯復敗羌時張奐上言羌種難盡宜以恩降詔書下

顯故顯上奏辨之此其奏中語
顯起於途中為并州刺史滅羌有功後

徵還京師顯乘輕車介士鼓吹曲蓋朱旗馬騎五萬餘

匹殷天蔽日鉦鐸金鼓雷震動地連騎繼跡彌數十里

詔賜錢千萬七尺絳襜褕一領赤幘大冠一具顯上言

掠得羌侯君長金印四十三銅印三十一錫印一枚長

史司馬涉頭長燕鳥校棚水塞尉印五枚紫綬三十八

案太平御覽作紫綬十七艾綬二十八

黃綬二枚皆簿入也

劉寬

劉寬

集范書本傳寬字文饒弘農華陰人

為南陽太守溫仁多恕吏民有

過但用蒲鞭罰之示辱而已寬簡畧嗜酒嘗有客遺蒼

頭巾酒迂久大醉而還客不堪之罵曰畜產寬須臾遣

人視奴疑必自殺顧左右曰此人也罵言畜產辱孰甚

焉吾懼其死也寬夫人試寬意伺當朝會裝嚴已訖使

婢奉肉羹翻汚朝衣婢遽收之寬神色不異乃徐語曰
羹爛汝手

陳球

陳球案范書本傳球字伯真下邳淮浦人為繁陽令清高不動

張奐

張奐字然明案范書本傳奐敦煌酒泉人為安定屬國都尉羌離滿

上奐馬二十匹案范書本傳時先零酋長仍遺奐金鏐八枚故奐有使金如粟之語此有闕文

奐召主簿張祁入于羌前以酒酹地曰使馬如羊不以

入廐使金如粟不得入懷盡還不受使匈奴

藥范書本傳與由安

定屬國都尉遷使匈奴中郎將此有闕文

休屠各及朔方烏桓並同反叛遂

燒度遼將軍門列屯赤地煙火相望兵衆大恐各欲亡

去奐安坐帷中與弟子誦書自若軍士稍安桓帝時為

武威太守其妻懷孕夢見奐帶印綬登樓而歌乃訊之

于占者曰必生男復臨茲邦命終此樓旣而生猛以建

安中為武威太守前刺史邯鄲商為猛所殺據郡反為

韓遂所攻州兵圍之急猛自知必死耻見禽乃登樓自

焚而死

陽球

陽球字方正

案范書本傳球漁陽泉州人

為司隸校尉詣闕上書謝

恩表言常侍王甫罪過奔車收送詔獄自臨考之父子
皆死于杖下乃磔甫尸署曰賊臣王甫于是權門惶怖
股慄莫不雀目鼠步京師肅然曹節見甫尸乃收淚入
言球罪帝徙為衛尉球叩頭曰願假臣一月必令豺狼
鴟梟悉伏其辜

趙咨

趙咨字文楚東郡燕人至孝躬率子孫耕農為養盜嘗夜往劫之咨恐母驚惶乃先至門迎盜因請為設食謝曰老母八十疾病須養居貧無儲乞少置衣糧妻子餘物無所惜諸盜皆慚嘆跪曰所犯無狀干暴賢者言畢奔走大司農陳奇

案范書本傳作陳瑞

舉咨至孝

荀曇

荀曇字元智潁川潁陰人為廣陵太守正身疾惡其兄

昱為沛相乃相與共除閹黨後昱與大將軍竇武謀誅中官與李膺俱死昱亦禁錮終身

符融

符融

案范書本傳融字偉明陳留浚儀人

妻亡貧無殯歛鄉人欲為具棺

服融不肯受曰古之亡者棄之中野惟妻子可以行之但即土埋藏而已

高彪

高彪

案范書本傳彪字義方吳郡無錫人

除郎中校書東觀後遷外黃令

畫彪形象以勸學者

范丹

范丹字史雲

無范書本傳丹
陳留內黃人

為萊蕪長遭黨錮事推鹿

車載妻子捃拾自資有時絕糧丹言貌無改閭里歌之

曰飢中生塵范史雲釜中生魚范萊蕪

韓卓

韓卓字子助陳留人臘日奴竊食祭其母卓義其心即
曰免之

曹節

曹節 梁范書本傳節字漢豐南陽新野人 上書曰功薄賞厚誠有踧踖此

書未知何時所上要
是濫賞時偽讓之辭

皇甫嵩

皇甫嵩 梁范書本傳嵩字義真安定朝那人 上言四姓權右咸各歛手

王允

尚書令王允 梁范書本傳允字子師太原祁人 奏曰太史令王立說孝

經六隱事能消却姦邪常以良日允與立入為帝誦孝

經一章以丈二竹簾畫九宮其上隨日時而出入焉及允被害乃不復行也

趙溫

趙溫字子柔蜀郡成都人初為京兆郡丞歎曰大丈夫生當雄飛安能雌伏遂棄官而去後官至三公

孔融

孔融案范書本傳融字文舉魯國人上書曰先帝褒厚老臣懼其隕越

是故扶接助其氣力三公刺掖近為憂之非警戒也云

備大臣非其類也

蔡邕

蔡邕

案范書本傳邕字伯喈陳留圉人

詔問有黑氣墮溫明殿東庭中

如車蓋騰起奮迅五色有頭體長十餘丈形似龍似虹

蜺邕對虹著於天而降施于庭以臣所聞則所謂天投

蜺者也

案司馬彪五行志此靈帝光和元年六月事

虹晝見御座殿庭前色

青赤上引邕問之對曰虹蜺小女子之祥

案范書靈帝紀此光和元

年七月事蓋兩月間虹災再見邕徙朔方上書求還續成十志

案劉昭續漢書

注載邕所上書畧云臣自在布衣常以為漢書十志下
盡王莽而世祖以來惟有紀傳無續志者臣所師事故
太傅胡廣知臣頗識其門戶畧以所有舊事與臣雖未
備悉粗見首尾積累思惟二十餘年不在其位非外吏
庶人所得擅述天誥其稟得備著作郎建言十志皆當
撰錄遂與議郎張華等分受之難者皆以付臣先治律
歷以籌算為本天文為驗請太史舊著攷較連年往往
頗有差舛當有增損乃可施行為無窮法道至深微不
敢獨議郎中劉洪密于用算故臣表上洪與共參思圖
牒尋繹適有頭角會臣被罪逐放邊野臣竊自痛一為
不善使史集所闕胡廣所校二十年之思中道廢絕不
得究竟誠恐所懷隨軀腐朽抱恨黃泉遂不設施謹先
顛踣科條諸志臣欲刪定者一所當接續者四前志所
無臣欲著者五及經典羣書所宜据據本奏詒書所當
依據分別首目并書章左願下東觀推求諸奏參以璽
書以補綴遺闕昭明國體攷十意即十志也范書本傳

李賢注戴十意之目云律厯意第一禮意第二樂意第三郊祀意第四天文意第五車服意第六餘闕又劉知幾史通稱邕于熹平中作朝會車服二志知十意中當有朝會蓋邕所作十意今得其七其三篇則不可攷云

周琰

周琰案范書琰見董卓袁紹諸傳以琰為漢陽人豫州李賢注引英雄記作周琰字仲遠武威人

刺史慎之子也

劉翊

劉翊案范書本傳翊字為汝南太守舉郡人許靖計吏子相潁川潁陰人

察孝廉除尚書郎典選舉

郭汜

獻帝幸弘農郭汜

案范書董卓傳李賢注引劉艾獻帝紀云汜張液人

日據掠百

官婦女有美髮皆斷取之

呂布

呂布

案范書本傳布字奉先五原九原人

以奮威將軍如三事

蔣疊

案蔣疊以下二十八人未審係何時代他書亦無可攷編附于此

蔣疊字伯重為太僕久在臺閣文雅通達明故事在九

卿位數言便宜奏議可觀

須誦

須誦為郡主簿獲罪詣獄引械自啄口口出齒獲免

馮模

馮模為司空坐隴西太守鄧融免官

周行

周行為涇令下車嚴峻貴戚跼蹐京師肅清

劉訓

劉訓拜車府令時東州郡國相驚有賊轉至京師吏民

驚皆奔城郭訓即夜詣省欲令將近兵據門以禦之

雍儵

雍儵字長魚事母至孝母常病癰儵晝夜匍伏不離左右至為吮癰

梁福

司部灾蝗臺召三府驅之司空掾梁福曰普天之下莫非王土不審使臣驅蝗何之灾蝗當以德消不聞驅逐時號福為真掾

范康

范康為司隸校尉務大綱性節儉常卧布被

蔣詡

蔣翊字元卿後母憎之伺翊寢操斧砍之值翊如廁

宗慶

宗慶字叔平為長沙太守民養子者三千餘人男女皆以宗為名

郝刪

卹刪字次孫早孤以至孝稱值天下亂野無烟火而刪獨在冢側每賊過見其尚幼而有志節奇而哀之

喜夷

喜夷為壽陽令蝗入輒死

李庸

李庸為蜀郡太守蜀之珍玩不入於門益州紀其政化

巴异

巴异為重泉令吏民向化鸞鳥止學宮

卜福

卜福為廷尉執諫求退上以為大中大夫

陳導

光武賜陳導駸犀劍

楊喬

楊喬曰臣伏見二千石典牧千里

翟歆

翟歆字敬子父予以功封臨沮侯歆當嗣爵母年老

國遠上書辭讓詔許乃賜關內侯

魏成

魏成曾孫純坐訐訕國除

畢尋

利取侯畢尋立孫守坐姦人妻國除

段普

首鄉侯段普曾孫勝坐殺婢國除

邢崇

夕陽侯邢崇孫之為賊所盜亡印綬國除

陰猛

陰猛好學溫良稱于儒林為太祝令以博通古今遷太

史令

羊融

羊融字子優為大司農性明達稱為名卿

張意

張意拜驃騎將軍討東甌備水戰之具一戰大破所向

無前

沈豐

沈豐字聖達為零陵太守為政慎刑重殺罪法辭訟初
不厯獄嫌疑不決一斷于口鞭杖不舉市無刑戮僚友
有過初不暴揚有奇謀異畧輒為談述曰太守所不及
也到官一年甘露降芝草生

蕭彪

蕭彪字伯文京兆杜陵人累官巴陵太守父老乞供養

父有賓客輒立屏風後應受使命父嗜餅每自買進之

陳翥

陳翥字君期習韓詩語曰關東說詩陳君期

東觀漢記卷二十一